



## In memoriam

**Prof. dr. Midhat Riđanović (1935-2023)** studirao je engleski jezik i književnost i francuski jezik i književnost na Filozofskom fakultetu u Sarajevu. Kao korisnik Britanskog fonda za jugoslavenske stipendiste, specijalizirao je fonetiku na Univerzitetском koledžu u Londonu (1959/1960.), a završio je i jednogodišnji kurs za simultane prevodioce u Beogradu. Ak. 1966/67. odlazi na postdiplomski studij iz lingvistike na Univerzitet u Michiganu, SAD, gdje 1967. godine stiče magistarski stepen iz lingvistike, a 1969. brani doktorsku disertaciju *A Synchronic Study of Verbal Aspect in English and Serbo-Croatian*. Tokom svog naučnog rada bavio se odnosom jezika i kulture te, većinom kontrastivno, fonetikom, morfologijom i sintaksom našeg i engleskog jezika, zatim teorijom kontrastivne analize i općom lingvistikom. Iz tih oblasti objavio je pet knjiga i preko trideset priloga u domaćim i stranim časopisima (*Radovi Filozofskog fakulteta u Sarajevu*, *International Journal of Slavic Linguistics and Poetics*, Los Angeles, *Književni jezik*, *Dijalog*, *Papers and Studies in Contrastive Linguistics*, Poznanj). Bio je član uredništva časopisa *Filološki pregled Saveza društava za strane jezike Jugoslavije*, glavni i odgovorni urednik *Godišnjaka Saveza društava za primijenjenu lingvistiku Jugoslavije*, predsjednik Društva za strane jezike BiH, predsjednik Saveza društava za primijenjenu lingvistiku Jugoslavije i, u tom svojstvu, član Međunarodnog komiteta za primijenjenu lingvistiku, spoljni naučni saradnik Instituta za jezik u Sarajevu te rukovodilac Sarajevskog lingvističkog kružoka. Bio je član Evropskog lingvističkog društva. Učestvovao je na brojnim domaćim i međunarodnim skupovima iz oblasti lingvistike i održao mnoga predavanja, unutar bivše Jugoslavije i šire. Na Odsjeku za anglistiku biran je 1964. godine za asistenta za engleski jezik, a potom u sva zvanja do redovnog profesora engleskog jezika i lingvistike. U ak. 1973/74. godini bio je gostujući profesor engleskog jezika na Univerzitetu u Bengaziju, Libija, i 1984/85. kao Fulbrightov stipendista na Državnom univerzitetu Ohio, gdje je predavao kontrastivnu lingvistiku i srpskohrvatski jezik. Umrovljen je 2005. godine, a za profesora emeritusa izabran 2006. godine.

I kao profesor emeritus nastavio je svoj naučni rad, pa je tako 2012. godine objavio kapitalno djelo na 700 stranica pod naslovom *Bosnian for Foreigners with a Comprehensive Grammar*. Gramatički dio tog udžbenika na 350 stranica je ocijenjen od vodećeg svjetskog slaviste (professor Wayles Browne) kao dosad najbolji opis bosanskog/ hrvatskog/ srpskog jezika, zahvaljujući ponajviše mnoštvu potpuno novih pravila i dosad najkompletnijem opisu akcenatskog sistema bosanskog/ hrvatskog/ srpskog jezika.

Profesor Riđanović je često pozivan da drži predavanja na domaćim i stranim univerzitetima. Među njima je posebno vrijedno spomena njegovo predavanje o glagolskom vidu (Oxford University). U svom naučnom radu je postigao vrhunske rezultate koji su ga svrstali u vodeće angliste i lingviste u Bosni i Hercegovini i na prostorima bivše Jugoslavije. Pri tom je bio usmjeren ne samo opštenaučnim već i pedagoškim ciljevima, tako da je inspirisao mnoge svoje studente da nastave studij lingvistike i danas budu profesori na domaćim i stranim univerzitetima. Jedan od njih, profesor Željko Bošković (University of Connecticut), je u predgovoru svoje disertacije napisao: *'I am especially grateful to Midhat Riđanović, my first linguistics teacher, whose contagious love for the field made it impossible for me not to become a linguist'*.

Ove riječi možda najbolje izražavaju koliki je uticaj profesor Riđanović imao na svoje studente i kako je uspješno trasirao put za njihovo bavljenje lingvistikom.

Kolegice i kolege sa Odsjeka za anglistiku, Filozofskog fakulteta Univerziteta u Sarajevu